



Tir Yimiyim

www.tiryimiyim.in

Regd. No. RNI. NAGAAO/2004 /13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 7

August ita tashi nung NDA sorkar chireptsü: Lalu Prasad Yadav

UK ato kilonser inyaksü Keir Starmer shimogo

VOL. XXI ISSUE NO. 264 (ADOK 264) DIMAPUR

KÜPTOKNÜ (SATURDAY)

CHITENI (JULY) 06, 2024 ₹ 5.00

Nagaland sorkari POSCO Act benshitsü

Kohima, July 5, 2024 (TYO): Nagaland sorkari Prevention of Children from Sexual Offences (POCSO) Act nung aliba onüktem benshitsü ta Chief Secretary Dr J Alam-isa shi.

National Commission for Protection of Child Rights kübok Nagaland State Commission for Protection of Child Rights (NSCPCR)-i state level symposium ka ayonga agidang Dr Alam-isa shi.

"State sorkari POCSO Act benshia asen chirnur tarutsü tajungba kümdaktsütsü tenangzükba lir. Tanurtem dak tashiyim inyakbatem metoktsütsü aser aibelenertem merenshitsü" ta pai ashi.

Nagaland POCSO ken o tem ataloker aser iba jagi district court shia nung POCSO ken o tem atema Special Court lapoka lir ta J Alam-isa shi.

National Commission-i state commission tem dang pei pei temzüng latettsü shiogo, ajisüaka iba mapaji menua meinyakba ajanga Commission-i model

guidelines yokogo, ta pai ashi. Nisung aikati POSCO Act junga memetet anungji commission-i iba ama symposium ayongzükba aser sendaktepa alirtem anidena POSCO lemsatepba atema tenüngsang agütsür ta Chief Secretary-isa shi.

Tanurtem ya asen tarutsü lir aser parnok temetentem kümzüka ayutsübaji kanga tongtipang, ta paisa shisem.

CS Alam-isa tanurtem dak sendakba agency aser telok ajak dang POSCO osang metetdaksütsü ayongzük.

Iba ama sentong ya district jenjang nunga agitsüla aser nübertemi meteta alitsü atema sabang balala ajanga sangdongtsüla ta paisa ashi.

Tanurtem dak tashiyim inyakba osang lemsatepsüla aser iba inyakyim azüoktsü atema lenmangtem bushitepsüla. Centre-i agütsüba POSCO guidelines Nagaland nunga benshitsü imlar ta J Alam-isa shi.

KMC ya model municipal council akümtsüla: Minister Salhoutuonuo Kruse

Dimapur, July 5, 2024 (TYO): July 5, 2024 nü Kohima Municipal Council (KMC) nung councillor 19 tezüngzüktep agiba sentong ka agiogo.

Capital Convention Centre nung ayonga agiba sentong nung Women Resource Development and Horticulture Minister Salhoutuonuo Kruse, Advisor Kropol Vitsu aser MLA Kevipodi Sophie nung aden.

Nübertemi shimtetba councillors ajak nem tenüngsang agütsür ta Minister Kruse-i o jembidang ashi.

Küm metsü sülen Urban Local Body (ULB) elections takok ngua agiba atema tenüngsang agütsür. Talisa tetsür nem 33% lemezükja ULBs election agiba atema Chief Minister dang pelar ta lai ashi.

"Kohima ya model municipal council kümdaktsütsü

nügdaker anungji councillors-i nübertem aser KMC tsüngda apu alatsüla. Sorkaria akokba tashi councillors yaritsü anungji nenoki Tsüngrem bushiang aser iba sülen takok nguyonga aotsü" ta Minister Kruse-isa ayongzük.

Sentong nung Kohima DC Kumar Ramnikant IAS-i tezüngzüktep agidaktsüdang election takok ngua agitetba atema nübertem, ketdangsurtem aser civil societies dang pelaba metetdaksü.

ULB elections magiteti aruba ajanga terenlok mapa meinyaktet lir saka tang nungibo maparen inyaka aotsü ta Kohima DC-isa ashi.

Sentong nung mendenji KMC Administrator T. Lanusenla Longkumer liasü aser EAC & KMC atema Returning Officer Dr. Riku Khutso-i anküp tepela o jemb.

CTC & MTC züngsemtemi tezüngzüktep agi

Dimapur, July 5, 2024 (TYO): July 5, 2024 nü Chumoukedima DC Conference Hall nung Chumoukedima Town Council aser Medziphema Town Council züngsemtemi tezüngzüktep agiogo.

Chumoukedima DC Abhinav Shivam, IAS-i CTC aser MTC councillors nem tezüngzüktep agidakja liasü.

Tezüngzüktep agiba sülen

council anaprong atema Chairperson aser Deputy Chairperson election agia liasü.

Chumoukedima TC nung Chairperson atema Lhousito Khro (NDPP) aser Deputy Chairperson atema Moala Ao (NDPP) na shim.

Medziphema nunga Abei Thepa (NDPP)-i Chairperson aser Neisaleno Khro (NDPP)-i Deputy Chairperson inyaksü.

Dimapur Municipal Council züngsemtemi tezüngzüktep agi



Dimapur, July 5, 2024 (TYO): Hokolbarnü Dimapur Deputy Commissioner Dr. Tinojongshi Chang, NCS-i Dimapur Municipal Council nung councillor 23 nem tezüngzüktep agidaktsüogo.

Deputy Commissioner conference hall nung tezüngzüktep agiba sentong agi aser iba sülen DMC Chairperson o Deputy Chairperson election agia liasü.

DMC nung NDPP nungi Hukheto Yepthomi-i Chairperson aser NDPP nungisa Imlinaro Stephanie Ezung-i Deputy Chairperson inyaksü shim.

Iba sentong nung Labour, Employment & Skill Development and Excise Advisor Moatoshi Longkumer, Administrator DMC Dimapur W.

Manpai Phom NCS aser tanga ketdangsurtem aden.

Dr. Tinojongshi Chang-i Dimapur District administration tenüng nung DMC councillors ajak nem tenüngsang agütsü.

Küm 20 sülen tang mezüng atema tetsür nem 33% lemezükja election agiogo anungji tanü anogo ya otsüsütsü anogo ka lir ta pai ashi.

DMC councillors-i Dimapur renloktsü atema nendaka inyaksü imlar ta DC-isa ashi.

Dimapur Municipal Council nung councillors:

- Ward-1 Chibeni Chishi- IND;
- Ward-2 Neingutoulie Kenguruse -NDPP;
- Ward -3 1. Sentinuklu Jamir - IND
- Ward -4 Hemlu Rongmei -BJP
- Ward 5- Kuhoi Zhimo- BJP
- Ward - 6 V. Khekato Awomi -BJP

- Ward -7 Nikali Sumi Chopi - NPP
- Ward-8 George Ayemi-BJP
- Ward-9 Lanutoshi Steven Yaden-NDPP
- Ward-10 H. Nikali Zhimo-NDPP
- Ward 11- Phyobemo Odyuo-NDPP
- Ward -12 Yimkumba-NDPP
- Ward -13 R. Chubazungla-NDPP
- Ward-14 Achum Jami-NDPP
- Ward No.15-Hukheto Yepthomi-NDPP
- Ward - 16 Nzanbeni Humtsoe-NDPP
- Ward -17 Omega Yepthomi-BJP
- Ward-18 Nampiebeu- NDPP
- Ward -19 Kili N Sumi-NDPP
- Ward-20 Lanuchuba-NDPP
- Ward- 21 Imlinaro Stephanie Ezung- NDPP
- Ward-22-Kivikali H. Chishi -BJP
- Ward-23-Jonathan Yepthomi - NPP

Mokokchung Municipal Council züngsemtem tenangzükba agi (Tanü councilor par 18 rongnung Chairperson & Dy. Chairperson shimtsü)



Tawa tembangba ULB election nung Mokokchung Municipal kübok ward 18 nungi councilor-tem tenangzükba agiba sentong ka 5th July, 2024 anogo yangi MMC Conference hall nung meraketa agir külen, tenangzükba agitsür Addl. Deputy Commissioner & Administrator Mokokchung Municipal Council, Chumlammo Humtsoe densema noksa nung angur. Mokokchung, 5th July, 2024.

Mokokchung, July 05, 2024 (TYO): Nagaland Municipal Act (NMA) 2001 nung Naga nung sobaliba dak mapetba arla kar inoksema aliba ajanga Nagaland songjen nung ULB election küm 20 dak tema magiteti aruogo, aji oda, NMA 2001 to intoker yaküm 2023 nung NMA tasen yanglur taküm Eastern Nagaland yimtittem dak alaka tanünga Municipal aser Town Council-tem nung otsüsütsüsa ULB election takok manung agiogo.

Mokokchung Municipal kübok ward 18 nungi councilor parnok 18 rongnung Nationalist Democratic Progressive Party (NDPP) nungi parnok 15 lir, Independent nungi ana (2) aser Indian National Congress (INC) nungi ka (1) densema lir. Tetsür atema menden balaka shiteta yutsüba (33% women reservation)-ji ward 6 liasü.

July 5, 2024 nü

Mokokchung Municipal Council Conference hall nung oath-taking sentong tatsüka agia councilor par 18 prong Mokokchung Addl. Deputy Commissioner & Administrator MMC, Chumlammo Humtsoe-i ketdang süa tenangzükba maparen kanga meraketa agia liasü.

Mokokchung Municipal Council züngsemtem yangi agütsür:

WARD No.	WARD TENÜNG	COUNCILOR-TEM	PARTY
1	Alempang (R)	Maongtola	NDPP (Uncontested)
2	Alongmen	Imlikümzük Kichu	NDPP
3	Arkong	Imtitoshi	NDPP
4	Artang (R)	Yongkongsangla R	Indian National Congress
5	Aongza	Imtiyapang	NDPP (Uncontested)
6	Dilong	Imkongchuba	NDPP (Uncontested)
7	Kumlong (R)	Satemkala	NDPP
8	Kichutip	Imkumniba Kichu	NDPP
9	Majakong	Bendangkumba Aier	NDPP
10	Süngkomen (R)	N. Imtinenla Ao	Independent
11	Sangtemla	I. Tali Longkumer	NDPP
12	Salangtem	Lanuakum	NDPP
13	Penli (R)	Walunila	NDPP (Uncontested)
14	Tongdentsüyong	Imkongsanen Imchen	NDPP
15	Yimyu	Sangyumongba Ao	Independent
16	Marepkong (R)	Repanungla	NDPP
17	Mongsenbai	Imlisanen Jamir	NDPP
18	Lijaba Lijen	Wapang Kichu	NDPP (Uncontested)

Ano Mokokchung Municipal Councilor par 18 rongnung Chairperson aser Deputy Chairperson shimtsü atema asüng July 6, 2024 nü, nikong 1:00 ako nungi tenzüka Deputy Commissioner's Conference Hall nung election agitsü ta Mokokchung Deputy Commissioner-i sangdonga lir.

BMSCHK ajanga HSLC & HSSLC nung takok angurtem tushi



Kohima, Chiteni/July 05 (TYO): Hokulbarnü IDEAL Charitable Society kübok Bright Morning Star Children Home Kohima (BMSCHK) ajanga iba Home nungi HSLC aser HSSLC tatidang nung takok angur nem tenüngsang agütsüba sentong ka ayongzüka liasü, kong tesemdang tongti ama

K. Wango Langsym, Deputy Director, Social Welfare Department, Nagaland dena liasü.

Timtem balala ajuruaka maneni meranga inyaksüji takum nung kanga tongtipang lir aser takum nung tayongzüka aser timtem arutsü, saka pei nükjidong nung rangloker

meranga inyakba ajanga nükjidong tongtetsü, ta Langsym-i ashi.

Pai tanurtem dang Tsüngrem mezüing südaksütsü ajungshia liasü.

Iba sentong nung Watisenla Walling menden liasü aser Alenuo Angami-ia o tatsüka jembi.

Dimapur-Kohima tsüngta NH-29 nung kumdanga senzütsü metetdaksür

Dimapur, Chiteni/July 05 (TYO): Hokulbar nikongdang Dimapur-Kohima tsüngta NH-29 nung Kukidolong (Paglapahar stretch) tsütsü Chathe (Patkai) bridge anasa nüngkum nungi long mezüzüka aluba gari (Bolero) ka kanga mejungi tsüksa saka yangji mena alirtem kecha meyiru kumzüka liasü.

Iba gari ya kangasa mejungi

raksa saka iba osang züluba mapang asü-amaba mesüra yiruba osangbo meliasü.

Iba lendong atalokba sülen Commissioner of Police, Dimapur ajanga nüburtem dang tzunglu tanen makai aruba ajanga National Highway 29 nung iba tesem ajanga senzütsü asoshi lendong lir, ta ashi.

Nüburtem dang akok tashi iba lenmang nung menüngdakba

mapang aser talisa tzunglu kanga sashia aruba mapang mesenzütsü ashi.

Iba lenmang nung senzürtemi gari tem tsüngta pila jajatsüla aser kanga saksalema jajatsüla, ta ashi.

Senzüsemponger tem dang akok tashi amfang nung mejajatsü aser menüngdakba nung gari anena mekazütsü CP Dimapur ajangasa ashi.

Tetsür entrepreneurs atema workshop ka ayongzük

Dimapur, Chiteni/July 05 (TYO): Women Entrepreneurs Network Nagaland (WENN) ajanga Department of Industries & Commerce (DIC), Govt. of Nagaland den lungjemer July 5, 2024 nü tetsür entrepreneurs pur atema business governance indang workshop ka ayongzüka liasü.

Iba workshop ya 'Year of Business Governance' omen kübok 'Importance of Regulatory Business Compliances & Documentation' onük nung ajemdaker

Conference Hall, MSME-DFO, 6th Mile, Dimapur nung agia liasü.

Iba workshop nung wadang balala nungi tetsür entrepreneurs 40 shi dena liasü aser o jembi aser subject experts tem WENN aser DIC nungi liasü.

Iba workshop nung Regulatory Business Compliances, Trade License, UDYAM & FSSAI Registration aser PMFME Scheme amala indanga angazükdaksü.

Dimapur, Chümoukedima aser Niuland district tem nungi tetsür entrepreneurs nem sorkar indang sentong balala aser business regulations indang awareness agütsütsü nükjidong nung iba sentong ya ayongzük.

Tetsür entrepreneurs nem tashi agütsütsü mechi 'Year of Business Governance' omen nung ajemdaker WENN ajanga Nagaland nung aliba district balala nung workshop ayongzüksü sentong aliba nung shilem ka ama Hokulbarnü iba workshop ya agia liasü.

Nagaland Board of School Education ajanga metetdaksür

Dimapur, Chiteni/July 05 (TYO): Nagaland Board of School Education (NBSE) ajanga registered Heads of Institutions ajunga dang sangdong ka nung ashiba agi, kaket reju ajak "Knowledge Institutions" ama MYBharat portal nung onboard asütsü Secretary, Department of School Education & Literacy and Secretary, Department of Youth Affairs, Government of India ajanga metetdaksüo.

Lanurtem outreach tajungba kumdaksütsü aser lanir tashi tajungba yangerdaksüba nung nisung mashi kati amshitetsü atema MYBharat portal ya institutional mechanism ka ama saya liasü.

Knowledge institutions ama

school aser college tem ya iba mechanism nungi ajangzüksü. Experiential learning activities aser community services atema volunteer inyakba ya standard tools ka ama agizüker aser iba ya ajanga lanurtemi team-building, teblemetsü balala bentetba aser communication skills tem tajungba kumdaksütetsü.

MYBharat portal yagi lenurtem iba ama maparen inyaksü atema facility agütsür. Universities/Colleges/Schools/Technical Institutions tem Knowledge Institutions ama takok ngua onboard asüba sülen web page balaka angutsü aser ibaji ajanga kaket reju temi short term 'Volunteer for Bharat' aser longer term 'Experiential

Learning' events ama lanuri shilem agitetba sentongtem digital version yanglutetsü.

Item sentong nung shilem agiba lanur temi pei indang mapa ya portal nung lanurtem nem agüja aliba kija profile pages nung sayutsü.

Kaket reju onboard asütsü atema registration link ya https://mybharat.gov.in/partner_register alitsü aser yangji agüja aliba SOP sülen anidaka pei sasa MyBharat portal nung onboard sütetsü.

Iba dak sendakba nung Heads of Institutions dang MYBharat portal amshitsü asoshi akok tashi tekeraba nung Knowledge Institution ama register asütsü metetdaksür, ta NBSE sangdong ajangasa ashi.

Mokokchung-Dikhu-Chare lenmang nokdang

Dimapur, Chiteni/July 05 (TYO): Mokokchung nungi Dikhu ajanga Chare leni aoba lenmang tuluba kuma inshiba nung alinen aser long anenzüka aluba ajanga yangji senzür aser mapa inyaker atema lendong timtem keta lir ta ajiteta, meyi matem tashi mesüra tarutsü nung sangdong ka magütsü tashi iba lenmang ya tang nungi tenzüka gari kata mesenzüi

shibanga atar, ta Deputy Commissioner, Mokokchung, Thuvisie Phoiji-i sangdong ka nung metetdaksü.

Mokokchung nungi Chare leni aor mesüra Chare nungi Mokokchung leni arurtemi iba lenmang melen Sewak Gate-Moalenden-Meyilong-Chare lenmang len jajatsü nüburtem dang metetdaksür, ta DC Mokokchung ajangasa ashi.

Mokokchung nung lenmang tezülen yua aliba osettsüset belentsü metetdaksü

Dimapur, Chiteni/July 05 (TYO): Mokokchung District Administration ajanga nüburtem dang lenmang tezülen ki o jen yangluba osettsüset yua aliba agientsü metetdaksüo, koba ajanga gari tem sadema mesenzüteter aser tesem ajaklen traffic jam adokdaksür.

Ajidang masü ki o jen yangluba osettsüset yagi tetsüing lenmanga nokdanga tetsüing agi senzürtem tim atemba den mopung menenja aoyi adokdaksür. Anungji nüburtemi tangsa iba totuyuba sülen anidaksü metetdaksür, ta Mokokchung District Administration ajangasa ashi.

Kohima nung Lower PWD-Middle Midland lenmang nokdanga lir



Kohima, Chiteni/July 05 (TYO): Kohima nung UCO Bank tsünglanglen July 3, 2024 nü retaining wall ka laoba ajanga Lower PWD aser Middle Midland sentaktepa main town leni aoba nokdanga lir.

Midland Panchayat Kohima ajanga iba osang ya Kohima Deputy Commissioner & District Disaster Management Authority nem metetdaksüo, ta osang ka ajanga ashir.

Midland Ward-9 nungi KMC

züngsem tasen Kekhrieselhou Angami (Neiu Metha) ajanga Hokulbarnü iba tesem ya semdanga liasü.

Kasa mapang Midland Panchayat general secretary, Toso Thaprii-iba jara lokzüka alua aliba tesem nung July 6

anepdang 6:00 ako nungi tenzüka lokti nübütsük alitsü metetdaksüo.

Iba lokti nübütsük sentong nung Middle Midland nung alir ajak adentsü ayongzükba sangdong ajanga ashi.

Tanü Phek Town Council züngsemtem tezüngzüktep agitsü

Dimapur, Chiteni/July 05 (TYO): Nagaland Municipal Act, 2023 indang Section 60 (A) kübok tashi agüja aliba amshia Phek Town Council nung züngsem asütsü shimteta alir ajunga den tezüngzüktepba July 6, 2024 nü anüngdang 12:00 ako nung DPDB Hall, Phek nung

agitsü, ta Deputy Commissioner, Phek, John Tsulise Sangtam-i sangdong ka nung metetdaksü.

Anungji iba senden nung Phek Town Council züngsem inyaksü shima alir ajak arua adentsü metetdaksür, ta sangdong ajanga ashi.

Chessor nung alinen agi ki ka aser gari ka raksatsü

Dimapur, Chiteni/July 05 (TYO): Shamator district kübok Chessore Town nung tzunglu kanga sashia aruba ajanga alinen alua ki ka raksatsü aser Noklak leni aoba truck ka K. Wongthu yimtsüing anasa alinen nung tsük, ta osang ka ajanga ashi.

Kephor aser Shiponger yimtsüing leni aoba lenmang mürek tenzüko, ta ashi.

Chessore Town kübok Keku colony nung alir Obed Yimkhiung'er meyong ki ka alinen agi raksaja liasü.

Kasa mapang K. Wongthu yimtsüing anasa NH 202 nung ali tanük asüba yong truck ka len kübokleni meters 300 shi mükepzüka ali. Ajisüaka iba lendong anaprong nung nisung asü-amaba mali, ta sangdong ajangasa ashi.

August ita tashi nung NDA sorkar chireptsü: Lalu Prasad Yadav



Chief Minister, Tejashwi Yadav-ia, Bihar nung assembly elections kera agitsüa akok, ta ashi.

Tejashwi-i, Bihar nung election taküm December nung agiaka mesüra sangküm agiaka Bihar nung Mahagathbandhan (India alliance) ama teloktepi sorkar akümtsü, ta ashi.

Patna, Chiteni/July 05 (Agencies): Hokolbarnü Rashtriya Janata Dal (RJD) tongti lenir aser taoba mapang Bihar Chief Minister, Lalu Prasad Yadav-i, taküm August ita tashi nung Centre nung Narendra Modi-i aniba NDA sorkar chireptsüa akok, ta metetdaksü.

Patna nung RJD party 28buba foundation day sentong nung jembidang taoba mapang Union Railway Minister, Lalu Prasad-i, August ita tashi nung

NDA sorkar chireptsüa akok aser election kera agitsüa akok, anungji party nung inyakertem renema alitsüla, ta ayongzük.

"Ni party nung inyaker ajak dang renema alitsü mepishir, kechiyong election ji mapang mashie ka nung agitsüa akok. Delhi nung Modi-i aniba sorkar kanga tashimait aser August ita tashi nungbo sorkar chireptsüa akok," ta Lalu Prasad Yadav-i ashi.

Lalu Prasad'er jabaso aser taoba mapang Bihar Deputy

RJD foundation day sentongji state yimtiba, Patna nung aliba RJD office nung agi.

Iba sentong nungji Aurangabad nungi MP aser Lok Sabha nung RJD parliamentary party lenir, Abhay Kushwaha-i Tejashwi Yadav nem taribi agi yangluba korang ka semja liasü.

Lalu Prasad Yadav-i party nung inyakertem dang kanga küküma alitsü aser yimtenren tensa melenshitsü, anungji renema alitsüla, ta ayongzüküa liasü.



July 05, 2024 nü New Delhi Railway Station nung Opposition Lenir, Rahul Gandhi-i loco pilots ajurudang tangokba noksa nung angur. Train anishirtemi Rahul Gandhi dang, train anir staff tem kanga ajema aliba agi parnok anisungzüksü atema mapang peria mangur, aser ibaji ajanga train lendong-a ajurur, ta metetdaksü.

PM-i Manipur indang jembiba ya opposition atema takok lir: Congress

New Delhi, Chiteni/July 05 (Agencies): Congress party-i, küm ka ser tesa dang shi lir Ato kilonser Narendra Modi-i tesüsa Manipur state nung rara indang jembiba ya opposition atema takok ka lir, ta metetdaksü.

AICC general secretary, KC Venugopal-i, "Tesüba küm ka ser tesa dang pai (Modi) Manipur indang kecha mejembi. Tatemsa yashi (Bodhbar) pai Manipur indang jembio. Iba ya opposition atema atangji takok ka lir," ta ashi.

Venugopal-isa, Lok Sabha nung Ato kilonseri onük jembitsü jakdang Manipur nungi MP ka nem minute pongu mapang magütsüba agi opposition-i senden nung timtem agütsü, ta ashi.

Bodhbarnü Ato kilonser Modi-i, Congress party-i Manipur onük nung politics asayaba anentsüla, ta ashi.

Paisa, "Tanübo state nung schools, colleges, offices aser reju balala lapokogo. Yimjung

atema Centre aser state sorkar napronglai stakeholders ajak den jembidar," ta metetdaksü.

Modi-isa, "Union home minister (Amit Shah) yangji (Manipur nung) hopta aika among. State nung tzümetstung lendong atema Centre sorkari Manipur den akokba tashi yaritepdar. Tanü NDRF team ana Manipur tonga ogo. Mi adoka alidak totzü shiloktsütsü merangertemji Manipur nüburtemi sendoktsü. Congress-i Manipur nung President rule 10 ben benoka liasü," ta ashi.

Yaküm May 3 nü Manipur nung All Tribals Students Union (ATSU)-i Scheduled Tribe category nung Meitei nunger züngokba anema longkak aitba nungi state nung rara tenzüküa liasü.

Iba rara nung nisung 200 dak tema asü, tekülem kitem densema kiojen jenti rongdok aser nisung meyrjang aika jenshiogo.

SC-i kasa kiyimba onük nung obendang agüja aliba reprangshitsü

New Delhi, July 05 (Agencies): India nung kasa kiyimtsü (tetsür o tetsür na mesüra tebur o tebur na kiyimtsü) atema tamalen temepishiba ken o agüja aliba Supreme Court-i magizükü liasü, ajisüaka Supreme Court dang tamalen obendang agüja alibaji reprangshitsü ahangba nung ajemdaker July 10 nü SC-i maneni iba ken o angadangtsü.

Chief Justice DY Chandrachud leniba nung Justices- Sanjiv Khanna, Hima Kohli, BV Nagarathna, aser PS Narsimha nungeri akümba bench-i tamalen agüja aliba obendang reprangshia ken o angadangtsü.

India nung kasa kiyimtsü atema ozüng ajanga temelaba agüjang, ta tamalen Supreme Court nem temepishiba ken o agüja liasü, ajisüaka yaküm October 17 nü Supreme Court-i kasa kiyimba memelatsü, ta obendang agütsü.

Yaküm Supreme Court-i, Parliament nung dang iba onük atema telemteba agitsüla, ta metetdakja liasü.

Ajisüaka judge pongui akümba bench-i, kasa o kasa meimtepertem külemi apuani ama alitsü atema temeden asadangtsü asoshi Union of India-i committee ka tentetsüla, ajisüaka item ama alirtemji 'kiyimba' ama ozüng ajangabo magizüktsüla, ta metetdakja liasü.

Supreme Court-i, kasa kiyimbaji ozüng ajanga memelatsüla saka parnok ama nisungtem temedenji akhümtsübuttsüla aser goods & services nung parnok mesendoktsüla, ta SC-i ashi.

Court-isa amokmeren aser timtem balala ajangshiba LGBTQIA+ nisungtem jenokdaksütsü atema district ajak nung "Garima Greh" shelters amenoktsüla aser parnok ama nisungtem atema emergency helpline agütsütsüla, ta metetdaksü.





"CHIYUNGTSÜ SAFETY ATEMA INYAKTSÜJIAJAK KHURET"

NEWSPAPER NUNG CHIYUNGTSÜ ALEPBAANENANG !!!

Food Safety and Standards (Packaging) Regulations, 2018 ozüng ajanga chiyungtsü aleptsü, nembangtsü, rizungtsü mesüra chiyungtsü anganüa agütsütsü atema newspapers/osangkaket shidi amshitsü memelar mesüra totzü nung aruba chiyungtsü nungi totzü tali indoktsü atema-a newspaper amshitsü memelar.

Newspaper nung chiyungtsü aleptsü atema bilemdang nai item ya teti bilemtetang;

- Newspapers nung amshiba ink (shihai) nungji temang nung timtem agütsütsüsa colours, pigments aser additives densema lir, koba ajanga chiyungtsü kanga junga sor süaka chiyungtsüji temang atema majung kümdaktsür.
- Printing nung amshiba ink nungji lead aser insang densema chemicals balala densema alitsüa akok, aser ibaji chiyungtsü nung menakokra ibaji ajanga mapang talangka nungbo temang nung timtem tulu adokdaksütsü.
- Newspapers alemba mapang nung aika ajangshir aser iba mapang nungji tenük agi manguba mesen tapu balala mesüra tanga pathogens balala chiyungtsü nungji menaloktsü akok, aser ibaji ajanga chiyungtsü tamajung chisema timtem balala agi shirangtsü.





Tanga lenmang tajungba kechisa lir;

- Chiyungtsü amshitsü atema yangluba mesüra temelaba agüja aliba materials amshitsüla. Item rongnung wax paper, butter paper mesüra food-grade plastic wraps (cling film wrap) densema lir.
- Chiyungtsü amshitsü atema stainless steel, somomo tou, tou takong mesüra glass pongdang amshitsü akok.
- Ano somomo tou, aou mesüra cornstarch agi yangluba plastics ama eco-friendly aser biodegradable packaging osettem amshitsü akok. Itemji chiyungtsü amshitsü atema ajungba dang masü saka tzü-mopung atema-a junger.

Tashi mangartem Food Safety & Standards Act 2006 nung Arrla 58 kübok temerenshi alitsü.

For any grievances mail usat:foodsafetynagalandhelpline@gmail.com
or contact us : +91 6009970644
Time : 11:00 a.m - 2:00 p.m
TUESDAY & THURSDAY (on working days)

State Food Safety Authority,
Department of Health and Family Welfare, Govt.of Nagaland.



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 06, 2024

Tetsürtemi tajungba inyaktsü imlar

Taoba küm Nagaland Legislative Assembly nung tetsürtem asoshi balaka shiteta yutsüba menden nungi masü saka teburtem den kasasa toktepa Nagatsür ana MLA akümba sülen tang Urban Local Bodies election nunga tetsürtem kisüing atema lemzüksüba tesemtem nungi dang masü saka tetsür - tebur ajak tokteptsü akokba mepu (ward) nunga tetsürtemi toktepa takok anguba angudang pelar aser parnok ketdangsüba nung tarutsü anogotem nung tajung ataloka aotsü nükla nung angur. Atangji, asenokbo tangar lima ama masü alima tila, anungji yimtia tilala dang asünungji Municipal aser Town council kübok aliba mepu (ward)-tem yaa tilala dang lir. Ibayongji, tajung kaji, pei mepu nung aliba kibong aser nisunga dena metettepa kinunger amai küma alir. Aji oda, iba yariji senotsüa tangar yimti nung sarutetba amaibo mesarutettsü aser government nungia pei mepu nungdak periabo magütsütettsü akok. Iba ama yimti ka nung ketdangsüsbaji teburtem dang nungibo tetsürtemang tajungba asütsü, kechiyong nisunger yimya nung teburtem dang nungibo tetsürtem tenendakba, tekümdangba aser temeyakba asür. Tia junger majungka, Naga nunger sobaliba aser yimten ya tebur akhüm aser teburtemi mulungba nung aoer, anungji taoba tatar senden tashi nungbo Nagatsür katia MLA mekümtet aser Urban Local Bodies nunga tetsürtemi shilem agitsübaji tim masüba mapa amato ka dang bilema liasü. Ajisuaka, tanübo Naga nunger tebur aser tetsürtem ajak tangatetba tajung kati aruagi tetsür-tebur ta mali, shiba dak tangatetba aser temulungtetba ali, pai mesüra lai yimten tashi amshia nübortem tenzüksü asoshi maongka agütsür. Atangji, Municipal aser Town Council teinyaktsütem rongnung tongtibangtibaji pei yimti merüka aser topur junga ayutsü atema inyaktsübaji asütsü. Ibaji atema shisa tasen (ideas) aika nungdaksü aser yimti topur junga ayutsüba maparen nungji tetsürtem shisatsü aser tekasa tajungba asütsü. Aji oda, tang Nagaland nung asentenshir Municipal aser Town Council kümtetba ya Nagaland nung town-tem merüktettsü purtem shimtetba amai lir, anungji iba tangatetba nung temulung temerük agi pei alidak merüktettsübaji ajak mulungjang nung bilema tenzüksüla. Atangji, tetsür asüyonga karbo teburtem dang nungia tamajungba aser menendakba alitsüa akok, ano karbo pei yimti among adena moudangba purtema alitsüa akok. Item ajakji mapa metenzükdangyongi renemtsütsü atema government-i tangatetba agütsüba aser lenisütsü renemtsüba sentongtem yanglua agütsütsü nungdaker. Tangbo asenok town nung alirtem pei pei alir, kia pei sünüdak pei sünütsü asür, lenmanga aser kilentzua pei ki indangbo pei mulungba tashika nung yanglua toktsür. Pei kidang aser mapa nung janaba janaona ajak okdener kilentzü nung oka yutsür aser ano aikati pi kima bener oa endoker. Ano, külen yimti aokertemia junga maoker, anungji asenok yimtittem nung teshinem aser manga agi sünga lir. Itemji merükteter teshinem agi teronem aser manga yimzüdak tesem agi naronü kümer yangji ninang yimzüksüsa municipal aser town council nung ketdangsertem, talisa, tetsürtemi anir inyaktsü imlar. Tangbo asen yimti memerük aser majungba agi bendanglen nungia tangar anir maruner. Ajisuaka, memenui asen yimtittem topur ajungba sayunü marem bendanglen nungia asen medemertem anir arua mongdaksütsü mapang arutsü imlar. Atangji, asen alidak yimti topur junga yanglutsüba nungji yimti nung alir senso ajak tangatetba aser shilem agitsü nungdaksü, kechiyong yimti topur ajungba ajanga aruba tajangzüktemjia yimti nung alirtemsa agitsü. Iba tangatetba nung kisüjensüba mapatem nunga ajaki ozüing kübok tashi angatepa alitsü nungdaker. Iba teimla nung tang asenok aliba yimtittem jenjang ya mamai repranga lidi, sangküm iba mapang nung yabo, tetsürtem aliba metetmeteta, terabo tajungba kümer lidir melilir .

OLEMSABANG

Naga nunger takar aser tzümar takar tepila

L. Kika Pongener.

(Yashi adok nungi...)

Asenoki tzümar takartem libalirobaji reprangdangra, parnok kechi-komaka kaa-ita liaka, achi-ajemba aser libaliroba ajak akhidang koma lia aru iba amaji dang alir. Takar-a ta ser balaka alakteta shisang-shisanga memelenshir. Minister, MLA, Officer menden nung amenyongjia libaliroba jenjang (Life style) balaka memelenshir. Asen Naga nunger takar ta jembirtem ya reprangdangra, temalen shisemba ama-to, teimba ka 'Temenep' asütsü...Kechiyong ajakbo yimer nem yimpok-su agüja benjong nangzükter malitsü südi. Ano asen Naga nunger takartem ya teimba ka, tsürabur mapangbo kanga timtema lia aliba, tia kaa sorkar mapai yir, jenjang tera junga kümer, tangar menepa jenjang junga alir teimba asütsü südi. Ajisuaka, aikati tsürabur jenjang-to amaadoker, karibo alima ajak alizükter amai, tangar tenuk agi mangu ulua bilemer aser o-a tulu-lu jembir. Tzümar takartem jenjangji shisadangra, parnokbo tsürabur nungi senmanga arur takartem teimba asütsü, ashiko, par lima nung ayawara aruyongjia, küm ka-anabo par yimer ajunga tongzükta mesutettsüsa rongsen akayongjia, item takartem jaji kecha maka amai ajem-ajema alir. Asen Naga nungerbo tera kaa-ita kümra, takar shisang-shisanga, taka marem kima-yimdong nung aser lokti senden nunga tenuk amour ken o tulu-lu, mezü-melema jembir aser takarji ya-ati ta jakdak-jakdaka lia sayur. Ashiko, Naga nunger takar ta asürtem ya...Kar dak alaka teimba ka...Tzümari 'Crore-Patti' ta ajaba ya, aikabo malitsü südi, saka tzümar takartem yabo teimba ka takar-tetsüdi 'Billionaire' aser 'Multi-Billionaire' -tem dang asütsü.

Atangji, asen Naga nunger dak aketba tashimait kaji, tera kaa-ita kümra, tangar tenuk agi mangur. Ajisuaka, rongsen ya mapang kopika asen ket nung alitsü'ar shinga-ia meteta maka. Aji oda, sensaker agi takar akümtsübo kanga tasak, saka takar agi sensaker akümtsübo kanga temela. Asen tenuki ngua, Naga nunger takar karbo kangasa 'High level' nung lia aliba, putu ana (60 years) mesuidang sensakpo jenjangi alur, temeimtsüka arishi tembangba ngua aruogo. Tanüa tular-takar kibong karbo, pei telidak ki tangar nem shibangdaksüba, aser pei kidang melitet atsükshia/jenshia senzüba angudang kanga meima repranger. Kangasa tesusatsüka, asen Naga nunger karibo, pei ket nung rongsen aser tashi (Power) lir ta ser...Azü-i Nashi monu mejaka ngur, monuji pa achila chiyungtsüa masü sernung, tenukmerema sanga/asaa aritokba amai...Adianu, temba-tinur, kin-kidong, yimtsür-yimer, külemi lisemer kar maparen kar nung jenjang junga ngura, ibaji tenukmerema jungnatsütsü/raksatsütsü meranger...Saka aji jungjunga bilemdangra...Pei chirnur/semchi-semnur nem khuret bendentsür ta pei sasa meshisadanger...!!! Tanü aseni kechi metsü proker ibaji kenu aseni arotsü ta meshisadanger...!!! Atangji, tajung suaka, tamajung suaka, aseni inyakba mapaji, kenu asen dangi, asen chirnur dangi aser asen semchi-semchi-semnur dangi meyipa arulanglang.

Ano asen Naga nunger dak tangatetba tai kaji, teti asenji jenjang junga alitsü ama bilemer, saka asenok ya melentepa aliba lima nung alir. Ali rongsenjia tanü kar ket nung alitsü aser asüngbo tangar kar keti aotsü. Anungji kechi komaka kaa-ita, ulua liaka ajemalua tila kümer nisung ajak den yimjung nung alitsüla. Tesusatsüka, asen Naga nunger karibo Tsüngremi moatsüba rongsen tai lenmang nung amshiba angudang kanga sasa-a repranger. Tsüngremi moatsüba rongsen agi lokti telemsa adokdaksütsü, tashiyim agi tangar kar akoktsüba, tangar kar ajemoka yutsütsüba, mesura supokrem agüja kar jenjang junga aliba raksatsütsüba, iba amala lenmang nung amshir...!!! Ajisuaka, tanü aseni tangar jenjang raksatsüra, kenu asen jenjang raksatsüsa tensa mapangi bentsür arutsü. Anungji aseni inyakba mapa agi Tsüngrem pelatsüsa aser Tsüngrem nungi temoatsü/maongka angutsüsa...Tsüngremi asen nem moatsüba rongsen agi, alima aser nubur asoshi mapa tajung inyaktsüla. Tsüngrem o-i ashir..."Tamajunger linuk nungi leptoktsü, ashikülaker tera nungi attsütoktsü" (A.Shin-2:22). "Shibaisa tajung melena tamajung agütsüdir; Par kibong nungi tamajung mepilatsü" (A.Shin-17:13). "Shibai kangla tudir pa idakji tsüktsü; Shibai long mezüdir aji pa dangi meyiptsü" (A.Shin-26:27). "Kokrabang naibo nisung ajak den yimjung nung liang" (Rom-12:18). Asen mimchirtemi tashiyim agi akokbaji takok tuluka angu ama bilemstü akok...Saka iba takokji kopika arishia nokdaka malitsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Bangladesh war mapang missionary inyaksang, Mamalassery süogo



2019 küm Meghalaya state sorkari missionary, George Mamalassery nem Pa Togan Sangma State Award agütsü dang tangokba noksa nung angur.

July 05, 2024: 1971 küm Bangladesh Liberation War mapang nung refugees yaria missionary putir inyaksang, George Mamalassery July 5 nü süogo; pa arrshi küm 92 liasü.

Putir mapa nungi anisüngzüker alisang, George Mamalassery ya Meghalaya state kübok Tura nung Arogoi lapokba hospital ka nung asü. Pa tangu sashiba tsütsü timtem adokba sülen taküm April ita nungi pa mozü chia treatment tagidak liasü.

Pa den tatembangbuba asüpila sentong July 8 nü agütsü.

Tura nung Auxiliary Bishop, Jose Chirackal-i, "Mamalassery ya missionary tajung ka liasü. 1979 küm pa leniba nung Arogo Tenla ki tenzüka liasü," ta metetdaksü.

July 5 nü osangbener den jembidang Meghalaya Chief Minister, Conrad K Sangma-i, "Pa [Mamalassery] ya tamang tebuti ka aser teimla lenmang sayur ka ama bilemtetsü. Pai inyakba mapa tajungtem ajanga onok maneni ajungmesotsü," ta ashi.

Putir Thomas Manjaly-i, "Pa ya tangatetba tajung aliba lenir ka, tanela agi sünga aliba

asere Tsüngrem tenzüksü jangraba lenir ka liasü," ta metetdaksü.

Tura diocese yagi East aser West Garo Hills districts na den Brahmaputra ayong tsütsülen Goalpara district tesem kar ayimjemer.

Taoba mapang Meghalaya nung minister aser National People's Party nung lenir, James K. Sangma-i, putir asüba ya Garo Hills atema takoksa tulu, ta metetdaksü.

Tura diocese nung tongti putir inyakba mapang nung Mamalassery-i diocese kübok Arogo tasen 23 züngoka liasü aser pa leniba nung Tenla kitem, presbyteries, convents, dispensaries, hostels aser school aika lapokogo, ta Tura diocese-i sangdong ka nung metetdaksü.

1979 küm pa tongti putir shimba sülen küm 28 tongti putir inyakdang Mamalassery leniba nung Garo Hills nung school 110, tetsür hostel 24, tebur hostel 23 amenoka liasü, ta parnokisa metetdaksü.

Pa leniba nungsa Salesians of Don Bosco teyari agia college ka amenok aser yimtsüngtem nung dispensary

20 amenoka liasü. Garos, Rabhas, Koch aser Hajong lisopurtem atema pa leniba nung hospital-a ka lapok.

Paisa nursing college ka lapok aser tetsürtem nem angati nurse training agütsü aser Old-age home ana lapoka liasü.

"1971 küm Bangladesh Liberation War mapang nung Mamalassery ya India-Bangladesh arrtsülen aliba Dalu parish nung missionary putir inyaka liasü. Iba Arogoi rara ajanga jenshirtem Tenla kidang jenokdakja chiyungtsü aser süoshi densema teyari balala agüja liasü," ta Tura diocese-isa metetdaksü.

Bangladesh Liberation War ya West Pakistan nung aliba Pakistan army aser East Pakistan na tsüngda raraba tongbang liasü, iba rara nung nisung jenti asüba sülen Bangladesh nüchiso angu.

Bishop Chirackal-i, "Pai nüburtem nüngdak ajak angateta liasü. 2007 küm pa anisüngzükbaba sülen-a pai maneni diocese tenzüka aruogo," ta metetdaksü.

Nütsüng million 3 aliba Meghalaya nung nütsüng shilem 75 bo Khristantem lir.

USCIRF-i Sri Lanka nung yimsü temeden report metetdaksü

July 05, 2024: Tawa United States Commission on International Religious Freedom (USCIRF)-i Sri Lanka nung tamangba yimsü temeden jenjang indang report ka sangdongogo, ta International Christian Concern (ICC)-i metetdaksü.

Sri Lanka nung Khristantemi Tenla ki tasen asütsü atema temelaba angutsü kanga tasak, Khristantem amokmerener aser online ajanga Khristantem anemba kanga bulua kümdar, ta USCIRF report ajanga metetdaksü.

USCIRF-i U.S. Department of State dang 2023 küm aser 2024 küm naprongla nung Sri Lanka ya Special Watch List (SWL) linüktem rongnung züngoktsü benokogo. SWL nung

züngokba ajanga US-i Sri Lanka ya yimsü nung ajemdaker nüburtem reshikangshiba linük ka ama züngshitsü aser Sri Lanka nem agütsüba teyari kar agientsü.

Sri Lanka linük temzüng ajangabo nüburtem nem yimsü temeden agütsür, ajisüaka iba linük nung Buddhist yimsü tongtibangba kümdaksüba ajanga nütsüng ajema aliba yimsütem reshikangshir.

Sri Lanka nungbo Khristantem reshikangshibaji telok balalai masü saka talisa sorkar ketdangsertem ajanga lir. Iba linük nung Tenla ki asütsü atema temelaba angutsü kanga tasak, ibayongji Khristan yimsü prokba tsütsü timtem ajangshir.

U.S. Department of State-i item tebilemtsü onüktem ya

2023 küm International Religious Freedom Report nunga metetdakja liasü.

"National Christian Evangelical Alliance of Sri Lanka (NCEASL)-i ashiba agi, 2023 küm linük nung Khristantem anema inyakba tatalokba 43 lir. Item rongnung pastor tem aser Khristantem amokmerenba mesüra azükba, tekülem sentong tagidak mapang timtem agütsüba, Khristantem bendanga züngshiba aser Tenla kitem raksatsüba tatalokbatem densema liasü," ta ICC-i metetdaksü.

Khristantem anema inyakba tatalokba aika nung police mesüra sorkar ketdangsertemia shilem agia liasü; aiben police-i pastor tem nem tai tongloktsür, ta NCEASL-i metetdaksü.

ANOGO ABEN TSÜNGREM DEN

Tsüngrem mesükba den putepa

"Kechiaser Tsüngremi mulungba ya, oda nenok temeshitetba" (1 Tesa. 4:3).

Asenok nem agütsüba ozüng alizüngji "Temulung temerük aser mulungsentsü tajung anemsü maliba tamang nungi adokba temeim atema lir" (1 Tim. 1 :5). Tsüngrem mesükba den sütepa melira Tsüngrem leniba item den madentsü.

Laishibai asenok kong alitsüla aser shiba den satitsüla shia mali. Saka külem inyakerem den aser asenok shir den alir parnok den tesendaktep junga alitsü indang Lai nung teperi shia lir (Kol. 3:22-25). Kati ka den sendaktepa alitsü (Kol. 3:1-14) aser kibong nung (Kol. 3:18-21) Tsüngremi mulungba inyaksü. Tetezü Tsüngrem den aser kiyonger den putepa alitsü indang Laishiba nung sayur, "Nai Kibuba ne Tsüngrem ne mulung ajak agi, ne tanela ajak agi aser ne tashi ajak agi meimtsüla... Aser nai ne kiyonger na ama meimtsüla. Item ozüng ana nung ozüng aser ainkar 0 ajak itaka lir" (Mathi 22:37-39).

Laishiba nükjidong ajungaji Tsüngrem den koda sendaktepa alitsü aser kati ka den koda putepa alitsü aji sayur. Asenoki iba Tsüngrem dak amanga inyaker.

Tsüngremi jatetba nisung ka na asütsü mulungtetang. Na alema shingai na Tsüngremi ajaba nungi nokdangtsü makok. Kibuba, tanü ni Nai ajaba nübu ka süner, Ne den aser ni meketa alirtem den putepa linür ta asenoki shidi.

Caritas India-i Assam nung tzümetsüng lendong agi kongshirtem yaritsü

July 05, 2024: India nung (ASDMA)-i metetdaksü.

Catholic Arogo kübok social service wing, Caritas India-i Assam nung tzümetsüng lendong agi kongshirtem kümzüksü aser yaritsü.

Osangbenertem den jembidang Caritas India nung lenir, Jonas Lakra-i, "Onok team renema lir. Tang onoki NGO network den senteper iba tensa asandangdar," ta metetdaksü.

Paisa, "Tzümetsüng tensa ya kanga majung. State sorkari temelaba agütsüba sülen Caritas team-i kümzükbaba maparen aser teyari agütsü tenzüksü," ta metetdaksü.

"Tang mapang ya tzülü nung mo atemba mapang lir, ajisüaka aluyimba li aika nung tzü metsüngbanga lir, anungji aluyimertemi takoksa tulu angutsü," ta paisa metetdaksü.

July 4 tashi nung Assam nung tzümetsüng lendong nung nisung 46 süogo aser district 29 kübok yim 2,800 nung nisung million 1.6 kongshiogo, ta Assam State Disaster Management Authority

Tzünglu maneni aruba ajanga nija ki aser sorkar kiojen aika raksaogo aser nisung meyrjang aika relief camps nung jenokdakja lir. Assam nung tzümetsüng agi tamajungba kongshiba district temji Nagaon aser Darrang district na den Barak valley kübok Karimganj lir.

July 4 nü Assam sorkari Kamrup district nunga nüburtem tekümdangtsü metetdaksüogo, kechiyong Brahmaputra, Digaru aser Kollong densema ayong aika nung tzü tali mobanga yimdar, ta ketdangsertemi metetdaksü.

State nung relief camp 181 aser relief distribution centers 334 amenoka lir, aser item camp nung tang tashi nung nisung 25,744 jenoka lir.

Ano külen Assam Chief Minister, Himanta Biswa Sarma-i, tzümetsüng tensa azüokteta dang lir, ajisüaka tensa tajungba akümtsüji taruba anogo ishika tsüngda tsüngsang-mopung dak dang keta lir, ta metetdaksüogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Taitsü

- (v) tetoktsü, yutsür tuo (do not leave)
- * Mitsa nungi taitsü ta tiri mitkartem dang metetdaksü.

Taitsü

- (n) janalongna oktenba oset (hook)
- * Talibai taitsü ka bener arur jana ajak oktener endok.

OLONG PAITEP # 6838

1		2				3			4
								5	
6									
					7				
		8							
								9	
	10			11					12
	13								
						14			
15									
			16						

TIPIEN

- 2. Tejembinü - 6
- 5. Iba oset ya ajaki aginer - 3
- 6. Aou tapu ka - 5
- 7. Prangpong agi tepset - 5
- 8. Temokok tsünglanglen - 5
- 11. Langtem - 5
- 13. Süngdong tatembang - 5
- 14. _ _ _ _ _ sadoka - 5
- 15. Terok nungi adokba - 3
- 16. Tamagitsü nung mapang endok - 6

LANGTSÜNGLEN

- 1. Meshitak - 5
- 2. Anjongmeshi - 6
- 3. Moijing - 5
- 4. _____ aren - 5
- 7. Tezülen - 5
- 9. O bendangdak - 6
- 10. Sensatsü - 5
- 11. Teka amtep - 5
- 12. Tango _____ - 5

OLONG PAITEP # 6837 TELANGZÜBA

TIPIEN:

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nüngjem, 25. Süra.

LANGTSÜNGLEN:

- 1. Khu, 2. Süjak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju, 21. Ano,
- 22. Onü, 23. Kua.

NAI-A YA METETTER MA



Karnataka nung Shivganga RSC (roller skating club) ajanga Guinness World Record (GWR) naroküm tasen ka ngutetogo. Belgaum nung amenoka aliba club-i "Fastest 100 m backwards on inline skates using two wheels" otsü tasen yanglutetogo. Shivganga RSC nung züngsem kati inline skates (two wheels) semer second 14.84 nung tesüleni 100 metres aoba ajanga iba otsü yanglutet.

Centre-i Assam tzümetsüng koktettsü atema lenmang bushir



Dibrugarh, July 5, 2024

(Agencies): Centre sorkari Assam nung tzümetsüng tebilemetsü khuret agientsü atema lenmang bushiteper ta union minister Sarbananda Sonowal-i ashi.

Sonowal-i Dibrugarh aser Tinsukia district tem nung tzümetsüng tensa asadangba sülen iba osang metetdaksü.

"State aser Centre sorkartemi Assam nung tzümetsüng tensa teti atema azüoktsü atema sentong atonger" ta pai ashi.

"Assam tzümetsüng ajanga nisung lakh aika kongshia lir. State aser Centre sorkartemi relief materials agütsüdar" ta Sonowal-isa ashi.

Assam nung taküm tzümetsüng nung nisung 52 süogo aser district 29 nung nisung lakh 21.13 shi kongshia lir.

Testüiba ghonda 24 tsüingda

lendong balala nung nisung 6 süogo ta Assam State Disaster Management Authority (ASDMA)-i ashi.

District 24 kübok relief camps aser distribution centres 515 nung nisung lakh 3.86 tema jenoka lir ta ASDMA-isa ashi.

Assam nung tzümetsüng agi kongshia aliba district temji Goalpara, Nagaon, Nalbari, Kamrup, Morigaon, Dibrugarh, Sonitpur, Lakhimpur, South Salmara, Dhubri, Jorhat, Charaideo, Hojai, Karimganj, Sivasagar, Bongaigaon, Barpeta, Dhemaji, Hailakandi, Golaghat, Darrang, Biswanath, Cachar, Kamrup-M, Tinsukia, Karbi Anglong, Chirang, Karbi Anglong West aser Majuli lir.

Assam chief minister Himanta Biswa Sarma-ia Hokolbarnü Dibrugarh district nung tzümetsüng tensa asadanga liasü.

CM Sarma den

ketdangsürtemi Dibrugarh kübok HS Road aser Mahalaya Road semdang aser idakji alirtem den ajurutepa sensaksem.

CM Sarma-isa relief camps ana semdang. Pithubor Girls' Higher Secondary School nung nisung 173 jenoka lir aser pai essential supplies agütsütsü nangzük. Paise district commissioner dang medical care aser tanga nungdakbatem agütsütsü tetuyuba agütsü.

Khowang Higher Secondary School nunga nisung 380 jenoka lir aser pai parnok dang ki raksaa aliba yanglutsütsü nangzük.

Tanü CM Sarma den Assam panchayat and rural development minister Ranjeet Kumar Dass, water resources minister Pijush Hazarika aser local MLA-Teros Goala o Taranga Gogoi nunger liasü.

Amit Shah-i Mizoram semdangtsü: CM Lalduhoma

Aizawl, July 5, 2024

(Agencies): Union Home Minister Amit Shah-i taruba ita Mizoram semdangtsü aser Assam Rifles teseper belentsüba osang metetpelatsü ta Chief Minister Lalduhoma-i ashi.

Aizawl tiyongtsü nung aliba Assam Rifles teseper kilometre ishika pilar Zokhawsang-i belentsü sentong lir.

"Aizawl nungi Zokhawsang-i Assam Rifles teseper belentsüba

lemtet agiogo. Onoki iba tesemi headquarters belentsü atema inyaktsü. Assam Rifles teseper belentsü atema mapa inyakba reprangshimtsü atema ni Aizawl-i arutsü" ta Amit Shah-i Lalduhoma dang ashi.

Zokhawsang nung Assam Rifles battalion headquarters amenoktsü atema infrastructure development inyakogo ta state home aser tanga department temi ashi.

Zokhawsang anasa aluyimertem senzüba lenmang tasen ka yangluba ajanga Zokhawsang complex nung magazine building aser firing point tesem melenshigo ta Assam Rifles ketdangsürtemi ashi.

Zokhawsang nung Assam Rifles battalion headquarters ya yaküm April 1 nü Union Home Minister Amit Shah-i lapokja liasü.

Umiam aser Silchar lenmang atema Rs 24,000 crore lemezüksü

Shillong, July 5, 2024

(Agencies): Centre sorkari Meghalaya kübok Umiam nungi Assam kübok Silchar tashi lenmang tasen ka yanglutsü atema Rs 24,000 crore lemezüksü.

Iba four-lane road ya East Jaintia Hills district ajanga süitsü ta Meghalaya deputy chief minister Prestone Tynsong-i ashi.

Iba lenmang ajanga national highway-6 melenzüksü kechiyong East Jaintia Hills district kübok tesem aika nung national highway-6 raksa lir ta pai ashi.

Iba mapatong ajanga

Meghalaya-i Assam, Tripura aser Mizoram state tem den tesentaktep tajungba akümtsü.

Iba four-lane road ajanga Meghalaya nungi Silchar, Mizoram aser Tripura tashi ayongayonga senzütsü. Iba lenmang ajanga Guwahati den sendakteptsü ta Prestone Tynsong-i ashi.


Sen lemezüksüba nung ali kibur nem temenok agütsütsüba dena Rs 12,000 crore ajanga Meghalaya-Assam arrtsü anasa Umiam aser Malidor tsüingda kilometre 100 yanglutsü atema sen lemezüksü.

Tanüingba Rs 12,000 crore ji

Assam nung four-lane road yanglutsü atema lemezüksü.

Union minister of road transport and highways Nitin Gadkari-isa June 24 nü Lumshnong nungi Malidor tashi NH-6 yanglushitsü atema Rs 290 crores mulunga agizükogo ta Deputy CM Tynsong-isa metetdaksü.

June 24 nü New Delhi nung Gadkari-i Meghalaya chief minister Conrad Sangma den senden ka amendang Meghalaya nung terenlok mapa balala inyakba lemsatep aser iba nung Jowai nungi Ratacherra tashi NH-6 yanglushitsüba dena liasü.



"Chiyongtsü Kumzüka Ayutsüji Ajak Mapa"
FSSAI License certificate apply asütsü atema mera tem.

Step 1 - Mezüngbuba nung website www.foscoc.fssai.gov.in lapokang.
Step 2 - Apply for New License (Screen nung sayua alitsü) nung nemang.
Step 3 - Premise of operation shimang.
Step 4 - Select State adoktsü, State shimba sülen nü indang business komalar shimang aser sub-categories nungi komala business ar shimang.
Step 5 - Annual turnover 12 lakhs/annum dak tema shimang mesüra State License atema MT per annum shimang aser proceed nung nemang.
Step 6 - Eligibility repringang aser proceed nung nemang.
Step 7 - Form B nung application details ajak inokang aser Save & Next nung nemang.
Step 8 - Application Reference No, Company tenüng aser Address sayutsü (Mamai application reference number züluoka yuang). Food product category shimang aser Save & add nung nemang. Save & Next nung nemang.
Step 9 - Map nung sayua aliba red marker atsür arua premise location sayuang aser Ok nung nemang.
Step 10 - Nü indang singup details inokang. Nü indang login credentials mamai züluoka yuang, koba iba page nung sayutsü. Nü indang password yangluang. Tarutsü nung amshitsü atema nü indang login id aser password mamai yuang. Submit nung nemang.
Step 11 - Boxes nung aliba application details ajak agüjang. Year of license shimang (License fee tsünglanglen box nung sayutsü). Iba sülen nü indang registered mobile number nung OTP ka arutsü. Iba OTP ji inoker agüjang.
Step 12 - Nüngdakba documents ajak upload süang aser self-declaration form nung nemang. Save and next nung nemang.
Step 13 - Nü indang registered mobile number indang esign atema pop up ka angutsü aser proceed nung nemang. Website nung register asündang agütsüba mobile number ya application form nung agütsüba den kasa asütsüla.
Step 14 - Nü indang registered mobile number nung OTP ka arutsü aser proceed süang.
Step 15 - Iba sülen online payment (application fee) atema page ka angutsü aser mode of payment shimang.

***Temetetsü :** License category atema payment ya installments ana nung agütsütsü. Installment tanabuba ya licensing authority ajanga scrutiny aser verification sülen agütsütsü.

Licensing Authority ajanga nü indang application scrutinized asütsü aser shidak lira processed asütsü. FSSAI License certificate ya generate asütsü aser pasasa nü indang registered Email ID dangi yoktsü mesüra login id aser password amshia nai login sütetsü.
 Application mabensa lira, Licensing Authority ajanga nü indang email ID aser nü indang FSSAI account dangi jangshitsü atema query ka yoktsü, koba Licensing authority indang totuyuba nung aliba ama mapang shidak nung telangzüba agütsütsüla.

***Temetetsü - Imlibilema mobile number aser email ID tejangja agüjang.**

Tali tejangjaba metettsü atema foodsafetynagalandhelpline@gmail.com nung mail süang mesüra +91 6009970644 nung jembiang.
Mapang - 11:00 a.m-2:00 p.m only
 TUESDAY & THURSDAY (mapa inyakba anogo)

**State Food Safety Authority,
 Department of Health and Family Welfare, Govt. of Nagaland.**

**Office of the
 Khensa Senso Mungdang
 TENÜNGSANG AGÜTSÜR**

2024 Nagaland ULB Election nung takok anguba asoshi Khensa Village Council aser Khensa Senso Mungdang ajanga tenüngsang agütsür.

1. Mr. Sangyumongba,
 S/o Late Medemyuba, Ward No. 15 Yimyu, Mokokchung.
2. Mrs. Temsümenla
 D/o Late Tekameren, Ward No. 7 Mangko, Mangkolemba.

Nenok lenisüba kübok nübur tejakleni aotsü imlar. Tsüngremi nenok taküm aser wadang moajangma.

Sd/- **Sd/-**
I.Alemmeren Langchar **Lanuakum**
Chairman **President**
Khensa Village Council **Khensa Senso Mungdang**

Nepal PM Prachanda ano July 12 nü floor test agitsü
Kathmandu, Chiteni/July 05 Deuba aser Sharma Oli ya (agencies): Tan hopta alliance taoba mapang ato kilonser partner tongtipang anati Nepal inyakdanga lir.
 Ato Kilonser Pushpa Kamal Züngsem 275 aliba House of Dahal 'Prachanda' yutsüba Representatives nung Nepali sülen July 12 nü House of Congress ya züngsem 89 lir. Representative nung vote of CPN-UML ya menden 78 lir. confidence agitsü lir, ta Prachanda'er Communist Party of Bresthibarnü sangdonga liasü. of Nepal-Maoist Centre ya Iba vote agitsü asoshi menden 32 lir.

achayangtsü atema ato Lower House nung menden kilonser-i Parliament Secretariat 10 aliba CPN-Unified Socialist dangi shiti ka züluogo ta ashir. yagi Prachanda-i aniba sorkar bhukuma vote agütsütsü ta Party tulutiba nungi Cabinet shiogo. CPN-Unified Socialist Prachanda-i ato kilonser menden teyari ya liaka House of nungi manentsü saka Parliament Representative nung züngsem nung vote of confidence agitsü 63-i dang Prachanda bhukumer. ta sangdonga liasü. House nung vote of confidence akoktsü atema pai tasen ka kumtetsü atema vote 138 nüngdaker.

Nepali Congress tir Sher Küm ka ser tesadang tsüngta Bahadur Deuba aser arishi küm 69 tain Prachanda Communist Party of Nepal- asoshi ibai vode of confidence Unified Marxist Leninist pongu buba alitsü.

chairman K P Sharma Oli Nepal nung tesüiba küm 16 tsüngta yimten tashi lemsatsü tsüngta sorkar 13 liasü, anungji Hombar aonung tezüngzüktep iba Himalayan linük indang ka yangluba sülen Prachanda-i yimtenren nung tashi maitba iba osang ya sangdonga liasü. sayur.

Mauritania anasa rong ka meküpok, nisung 89 asü

Ndiago, Chiteni/July 05 Küm tetenzüklen European Union-i Mauritania dang tamajung inyakba tesemtem (Agencies): Mauritania migration azüoktsü aser ajanga refugee aser migrant tzükumlen rong ka migration azüoktsü aser tem tali senzür, kong nisung meküpokba mapang yangi humanitarian aid atema shibelenba, rongsen meshitsü mener Europe leni aor senotsü teyari 210m euros mechi apuba, tashiyim amshia migrants aser refugee 89 (\$229m) agütsütsü nangzüka mapa inyakdaksüba aser süogo, ta sorkar osang kar 'sexual exploitation' kanga lir, ajanga ashi. ta Hokulbarnü sayaba report

Ango apudang amshiba indang Canary Islands leni ajanga ashi. Iba linük nung Spain migrants tem aoba tali akumba mapang ka nung iba agreement ya agitepa liasü. Canary Islands ya Africa northwest tsütsü tzükum nungi kilometre 100 (mile 62) shi pilar lir.

Taküm küm tenzüker January 2020 aser May mezüng ita pongu tsüngta 2024 tsüngta Sahara lisem tzüyim ajanga Spain atongtsü lima ajangdang nisung 1,180 merangba mapang nisung asüba meteta lir, saka iba 5,000 dak tema süogo, mesüra dang kanga agi timba sür anogoshi nisung 33 asüba amai alitsü südi ta amanger.

Iba rong ya Senegal aser Taküm kisung nunga Gambia nungi nisung 170 nisung 72,000 dak temai mener ayameso ta iba lendong Caminando Fronteras ajanga ashir, anungji ano nisung 72 samar lir. Parnok ta timba Atlantic tzüyim lenmang nung asüba lir.

Lendong tesashi aliba Alilen nungi senzüner Atlantic tzüyim lenmang nung timba akumer, saka Sahara mopung sashia aonba aser nung asürtem ya tzüyim nung tzüssem tulu aliba ajanga rong asür dang anasü agi timba lir, ya meküpok ta ashir. ta United Nations refugee Migrants tem aiben tzüyim and migration agencies aser nung senzü majungba rong tila Mixed Migration Centre aser tamajung nung tali mener research group ajanga ashir. tajejmsü tzü peria mali senzür. Telungpur aser mapa

UK ato kilonser inyaktsü Keir Starmer shimogo



London, Chiteni/July 05 "Nenoki tanaben tamang (Agencies): United Kingdom maka tashi ozü sorkari anogoshi general election nung Labour raratsü. Tang nungi nenok Party-i kanga junga takok anguba tejangraba tenzüoktsü sülen ato kilonser tasenba Keir temulungtetba nem anidaksüba Starmer-i temelenshi agütsütsü sorkar ka angutsü," ta ashi. nangzüka liasü.

King Charles III den "kissing of hands" sentong agia sorkar tejangja sayuogo, aser onoki aji tasen tenzüoktsü atema temelaba amshia nenok nem temelenshi agütsütsü." agütsütsü.

Arishi küm 61 tain Starmer-isa Conservative telok nungi Ato Kilonser Rishi Sunak dang pelaba lemsatapa liasü aser nüngdaker, ta Starmer-i ashir. "Asen linük nung British Asian ato kilonser mezüngbuba ama pai takok anguba shingaiya mezüngmeshi masütsüla," ta ashir.

(Maneni tapak 8 nung...)

Nagaland team Sentinel Cup semi tongogo



Sentinel North East Cup 2024 nung Nagaland nungi asayartem den coach aser manager külemi tangokba noksa ka yangi angur.

Kohima, Chiteni/July 05 (TYO): Hokulbarnü Nagaland tetsür football asayartemi Sontipur, Assam nung tang tasayadak Women Sentinel's Cup indang league match tatembangba nung Meghalaya madak 5-0 agi akokba sülen semifinals tongogo.

Iba asayamung ya Assam Rifles ajanga ayongzükba lir, kong North East kübok Assam, Mizoram, Meghalaya, Tripura, Nagaland aser Arunachal Pradesh nungi team ka-ka aser

Director General Assam Rifles Women Football Team nungi telok kati shilem agir.

Mezüngbuba Sentinel North East Cup 2024 nungya Nagaland nungi "Naga Damsels" ta sür football club kati shilem agir. Iba team ya state coach Kevilebei Zashumo aser manager Viliebeizo Liezietsu nati anir lir.

Pool B indang league match tatembangba nung Nagaland aser Meghalaya tsüngta asayadang Nagaland nungi

Neke Konyak-i goal asem aser Chimmushe & Watijungla nati goal ka-ka agüja liasü.

Mezüng asaya nung Nagaland ya Arunachal Pradesh-i 5-1 agi akok aser tanabuba asaya nung Nagaland-i 6-0 agi Mizoram madak takok ngua liasü.

Nagaland ya Pool B nungi runner up ama semifinal tongogo aser July 8 nü Pool A winner Director General Assam Rifles (DGAR) den asayatsü.

Kohima nung ananü U-17 state team shimba tenzükogo



Kohima, Chiteni/July 05 (TYO): Nagaland Football Association (NFA) ajanga ananü atema ayongzükba Nagaland Under-17 junior state team shimba sentong Indira Gandhi Stadium, Kohima nung Hokulbarnü tenzükogo.

Iba nung shimba asayartem ya state tenü nung Junior National Football Championship 2024-25 nung shilem agitsü, koba Naogaon, Assam nung July 30 nü asayatsü lir.

Mezüng anogo asayar 76

arua liasü aser maneni Honibarnüa agitsü, ta Nagaland Football Coaches Association tir Roko Angami-i metetdaksü.

Iba trial ya NFA tir K Neibu Sekhose, general secretary aser MLA Benni M. Lamthui aser coaches tem lia agia liasü.

Copa America: Emi Martinez-i Argentina kumzük

Houston, Chiteni/July 05 (Agencies): Brehostibarnü Copa America 2024 quarterfinal ka Argentina aser Ecuador tsüngta asayaba nung goal 1-1 agütsür penalty metsütepba mapang goalkeeper Emi Martinez-i anaben nokdangteta 4-2 agi Ecuador madak takok ngur Argentiba semi-finals tongogo.

Lisandro Martinez-i Argentina asoshi goal ka agütsü, saka stoppage time nung Kevin Rodriguez-i kepzükta liasü, saka Copa America final dak alaka danga asaya nung extra time mali indang-indanga penalty metsüteper.

Argentina asoshi Lionel Messi-i mezüng metsüba crossbar nung tsükdak, saka Ecuador nungi Angel Mena aser Alan Minda nati metsüba Martinez-i nokdangteta semi-final tongogo, kong Venezuela mesüra Canada den asayatsü.

"Penalties nung goalkeeper dak tenük amor tamang akar aser ibaji tongtipang lir. Leo-i goal magütsütetaka ozü goalkeeper-i junga mentettsü kanga tongtipang liasü," ta Argentina coach Lionel Scaloni-i ashi.

"Iba ama takok anguba ya jangratemtsü maket. Hao onok pelar, saka iba ama takok ni mejangrar."

Group match tatembangba Peru den asayadang yiruba ajanga Messi masayatet, saka Ecuador den tetenzük nungi asaya liasü.

Argentina-i amokbanger asaya saka Ecuador-i mezüng maongka ngua Jeremy Sariato-i metsüba Martinez-i nokdanga liasü.

Iba sülen minute 35 buba nung Martinez-i pa asoshi international goal mezüngbuba agütsüteta liasü.

Asaya tembangtsü mapang Rodrigo De Paul teka agi ball nung kongshiba mechi penalty metsütsüsa akum aser Ecuador captain Enner Valencia-i aibelen mesüi goal yoka liasü.

Andy Murray asoshi Wimbledon asayamung tatemleni arur

Wimbledon, Chiteni/July 05 (Agencies): Andy Murray asoshi tatembang buba Wimbledon asaya tenzükdang Brehostibarnü tamakok ajurua pa jeba "Ni tatem maka sayinüali," ta ashi.

Wimbledon nung kija asaya anaben champion bona alisang Murray aser teti Jamie tena ya tebur tarep round mezüngbuba nung Australia nunger Rinky Hijikata aser John Peers nati 7-6 (8/6), 6-4 agi akok.

Ibai arishi küm 37 tain Murray atema 'retirement three-parter' mezüngbuba episode alitsü, shibai Wimbledon nung Emma Raducanu den külemi tarep temeyoktep asayatsü aser Paris Olympics nung retire asütsü lir.

Roger Federer aser Rafael Nadal densema nungtugu nisung aikati Murray nem video ajanga akum agütsüdang pa tenük nungi nüktzü yima liasü. "Na kodanga kisüng

meliasü. Nai nü mangdang abendang parnok indanga bentsü," ta tiben Wimbledon champion aser 20 ben Slam champion Federer-i ashi.

All England Club nung 2008 aser 2010 champion aser asayamung tulu 22 indang takok marok nguteta alisang Nadal-ia, "Nüden asayatetba atema onok tejak tenteter," ta ashi.

Tenetben Wimbledon champion aser tetsür indang Grand Slams 23 ben takok ngua alila Serena Williams-ia "Nü indang tepenjem anogotem ajak meyong," ta Murray dang ashi.

Mapang talangka pa den toktepa asayasang Novak Djokovic court nung Murray asaya repranga liasü.

2013 küm Murray-i pa asoshi mezüngbuba Wimbledon title ngua liasü, koba British teburi iba asayamung ya küm 77 sülen akokba alitsü, aser ano küm asem lir pai kasa asayamung nung takok ngua liasü.



Stuttgart, Chiteni/July 5: Hokulbarnü Euro Cup 2024 quarterfinal mezüngbuba asaya extra time nung A Mikel Merino-i goal ka agütsüba ajanga Spain-i Germany madak 2-1 agi takok ngua iba asayamung semi-finals tongogo. Iba asaya nung Spain asoshi D. Olmo-i minute 51 buba nung goal ka agütsü aser minute 89 buba nung Germany asoshi F. Wirtz-i goal ka agüja liasü.

BENDANGLI OSANG : Tapak 7 nungi...

UK ato kilonser inyaktsü Keir Starmer...

"Iba atema tanü parnok nem akhum agütsür."

Aji masüdang Sunak-i par party tamakok atema tenüng agi aser ato kilonser menden nungi aluba sangdonga Starmer nem takok tenüngsang agüja liasü.

"Iba mapa nung ni bendanga agütsür inyak, saka United Kingdom indang sorkar melentsüla ta nenoki tejangja signal agütsüogo," ta Sunak-i 10 Downing Street kima nungi ashi.

"Nenok ain adokba, jashiba ni angashiogo aser tamakok

atema ni agir. Conservative candidates aser campaigners shirnokisa anibelem arema inyakaka takok mangur ajak dang, nenoki meranga inyakba ama ni meinyaktetba atema tatok meshir," ta Sunak-i shir pa mapa nungi anenba osang agütsütsü chubar kidangi ao.

House of Commons nung menden 650 lir, aser iba osang züluba mapang tashinung Labour teloki menden 412 nung takok ngur liasü, aser Sunak'er Conservatives teloki menden 121 nung takok ngur liasü.

BILEMDANGANG
"Dangar timtemba nai angatetra na temoatsü angutsü."